

Zaldibarrena

(Zaldibarren)



GARMENDIA GARMENDIA familia

ZALDIBARREN Elbarrena auzoko baserria da. Bere inguruko baso eta zelaien izenen artean dauzkagu *Iturrialde*, *Etxaburu*, *Burdindadi*, *Aran-goiti*, *Soro haundi*, *Txaragaiñe*. Bertakoek diotenagatik, bere izena Zaldibiko azken etxea izatetik dator.

Baserri eta errepidearen artean Amundarain ibaia pasatzen da. Oinez herriko plazatik ordu erdira dago eta, Ordiziara lanera, ordu laurden edo hogeiren bat minutu behar zuten, bizikletaz. Serapio Mujikak dioenagatik, 1865ean egin zen Ordiziatik Zaldibira bitarteko bidea, baina herriko bidetik etxerainoko berrehun metroak 1968an egin zituzten.

Etxejabe dira *Zaldibarrengoak* 1850az geroztik. Oraingoan birraitona zen Gregorio Garmendiak erosi omen zion Zabala "bizkondeari" etxea, honak, aurretik, Lizarralde familia bertatik bidali ondoren. Baserria erosi aurretik *Euzkitza* baserrian bizi omen zen familia. *Zaldibarrenen* hiru etxebizitza dira eta "bizkondeak" berak egin omen zuen txotx nor non bizitzen jarri erabakitzeko.

Baserria 1936tik 1938ra bitartean konpondu omen zuten eta orduan aurreko aldeko habe artea erantsi omen zioten.

Baserrian bazituzten animaliak eta bertan egiten zituzten artoa, babarruna, patata, sagardoa... gero Ordizian saltzeko. Gaztaina eta sagarra ere saltzen zuten. Baserriko lanez gain, osaba-izebek fabrikari egiten zuten lan 1960tik aurrera.

Josefa M^a Garmendia *Aistrangone* baserrikoa eta Joan Garmendia *Zaldibarrengo*a 1941ean ezkondu omen ziren Zaldibin eta otordua etxean egin omen zuten. Madrileraino iritsi omen ziren ezkontza-bidaian, anaia jesuita zutelako han. Zortzi seme-alaba izan zituzten: Inazio, Angelita, Pedro Mari, Maria Dolores, Antonio, Joxe Mari, Maria Gloria eta Joxe Ramon.



Baserriaren arrastoa idatzietan

Zaldivibarrena agertzen da 1783-12-17an, Francisco Antonio de Echaveren aurrean, Enerio eta Aralarko sailen erabileraz bitartekari bati emandako botere-emaileen artean. Aipatzen denagatik lagun bat agertu zen bilerara.